



## Plan di gobernacion

**Partido Democracia Real su puntonan importante pa maneho den e proximo gobernación, cu lo trece e Cambio pa un mihor futuro:**

**1. Combati criminalidad y inseguridad:** Lo combati e criminalidad creciente cu ta azota nos poblacion den tur barío y ta afecta nos bishitantenan, den un forma structura y consistente. Lo move e shelter di ambulante for di centro di ciudad y areanan pobla, y crea solucionnan efectivo a corto y largo plaso pa e problematica di adictonan ambulante y di adiccion en general. Lo adapta y modernisa nos leynan civil y penal caminda cu ta necesario. Lo duna cuerpo policial mas espacio caminda cu por, pa e por ejerce su tarea debidamente.

**2. Restaura poder di compra, baha peso di belasting:** Lo restaura e poder di compra y baha e peso di belasting ariba nos pueblo via di reforma di belasting y disciplina fiscal. Lo elimina of baha cierto belastingnan na un manera responsabel. Lo percua pa pueblo haya su placa cu ela paga dimas na belasting, bek den un tempo cortico.

**3. Baha prijs di Awa y Coriente:** Lo introduci un maneho pa Energia pa yuda baha prijs di Awa y Coriente, reduciendo dependencia di petroleo (gasolin, diesel, fuel oil, "brandstofclausule"), via e.o. estimulonnan fiscal y uso di energia alternativa.

**4. Salubridad: Lo introduci un Masterplan di Salud cu lo ensera entre otro:**

- a. Mehora diagnostico y reduci e tempo pa haña resultado, invirtiendo den un Centro Diagnostico;
- b. Mehora e cuidu basico y amplia facilidatnan di Hospitaal;
- c. Implementa un programa activo di prevencion di malesa;
- d. Lo introduci un centro pa combati e malesa di cancer; e. Investiga cientificamente y duna balor na nos remedinan di tera;
- f. Lo modernisa e ley cu te regarda servicio di cuidu medico.

**5. Educacion: Lo mehora y reforma nos educacion cu e siguiente cambionan:**

- a. Lo percua pa nos scolnan haya un trabao di mantencion structura y proteha nan contra ladronia y vandalismo;
- b. Lo percua pa muchanan tin bukinan di mihor condicion y calidad pa uso na scol, combina cu en mihor maneho di coordinacion di flujo entre scolnan primario, secundario y profesional;
- c. Lo Introduci "Summer School" pa studiantenan cu ta cay como "bespreekgeval", pa purba reduci e fenomeno di "keda sinta" of "druip";
- d. Lo promove pa introduci of expande HAVO y VWO den otro distritonan (por ejemplo: Noord, Sta. Cruz, San Nicolas) unda cu tambe ta necesario;
- e. Lo kita e drempel fiscal cu e gobierno actual a pone pa cu donacionan na instancianan educacional y scientifico.

**6. Turismo:** Lo inverti den diversificacion di promocion turistico, busqueda di rutanen, seating nobo y socionan strategico, pa asina reduci dependencia di e economia di Merca. Lo concentra riba asina yama "niche markets". Lo sondea e posibilidad pa Aruba por tin un aerolinea nacional cu avionan di largo alcance. Tambe lo haci maximo esfuerso pa baha e airport tax riba vuelonan interinsular.

**7. Infraestructura:** Lo aumenta urgentemente e inversion den careteranan nobo (duradero y di calidad) y crea solucion eficiente pa move mas liher y sigur den trafico, yudando pueblo spaar tempo y gasta menos placa na gasolin y diesel. Tambe lo embeyece nos cruzada, retonde y plazanan publico pa hasi nan mas atractivo pa nos mes y nos bishitantenan.

**8. Finanzas publico:** Lo bin cu reforma di belasting y disciplina pa cu e budget di Gobierno. Lo crea un fondo di estabilizacion economico pa yuda nos enfrente crisisnan manera esun cu ta afectando nos pais.

**9. Proteccion di Medio Ambiente:** Lo introduci un Plan integral pa maneho y proteccion di nos medio ambiente. Lo pone bakinan di coleccion di suchi na puntonan strategico den e barionan. Lo elimina e suma di Afl. 10.00 cu ta cobra ora cu ciudadanonan hiba sushi na Dump y lo promove e.o. "waste to energy" (usa sushi pa haya energia). Lo baha invoerrecchten riba autonan cu ta gasta masha poco gasolin of diesel, of cu ta core ful of parcial ("hybrid") riba coriente.

**10. Economia:** Lo simplifica e proceso di lanta negoshi y stimula fiscalmente negoshinan cu ta diversifica nos economia. E estimulan fiscal lo ta dirigi na crea crecimiento economico positivo y duradero. Lo establece un oficina cu tarea pa duna mas atencion na e problemanan specifico di cada distrito, y yuda den nan desaroyo. Tambe lo percura pa bin cu mihor control di prijs pa cu e canasta basico.

**11. Asuntonan Social:** Lo ekipa y organisa nos Departamento di Asuntonan Social pa atende na un manera mas efectivo y cu fondonan necesario e problemanan familiar, embarazo hubenil, "dropouts", falta di motivacion y conflictonan social bao di nos hubentud. Lo crea centronan di recreacion familiar, caminda famianan completo lo por entretene nan mes na un prijs pagabel. Lo kita e drempel fiscal cu e gobierno actual a pone pa cu donacionan na instancianan social y charitativo.

**12. Deporte:** Lo mehora e calidad di facilidadnan, di training y stimula mas participacion di e pueblo den actividadnan deportivo, tanto como deportista of como expectador, hisando subsidionan pa deporte y cultura, y traha mas eficiente cu sector priva y organizacionnan no-gubernamental. Lo kita e drempel fiscal cu e gobierno actual a pone pa cu donacionan na instancianan deportivo.

**13. Cultura:** Lo crea un maneho integral di nos cultura cu lo mester crea un impacto educativo, social y turistico pa conserva y promove nos cultura y identidad. Lo kita e drempel fiscal cu e gobierno actual a pone pa cu donacionan na instancianan cultural.

**14. Democracia participativo:** Lo introduci un plataforma di dialogo nacional cu lo reuni a base regular cu tur gremio riba desicionan importante y retonan grandi pa nos pais. Lo institui un "Board of Advisors" cu lo duna Gobierno conseho riba aspectonan di maneho en general. Lo tene debido cuenta cu e conclusionan y ideanan di e iniciativa conoci como "Aruba 2025". Lo promove "e-government" pa e ciudadano lo por aplica online pa servicionan publico y comunica mas efectivo cu departamentonan di gobierno.

**15. Calidad di gobernacion:** Lo combati y preveni corrupcion stipulando den ley cu no por desvia pa proyectonan grandi sin bai un destaho publico, cumpliendo asina cu criterianan internacional di transparencia y bon gobernacion. Lo modernisa e Ley di Comptabilidad.

**16. Agricultura y pesca:** Lo duna atencion berdadero na nos cunucero y piscadornan, y stimula agricultura y pesca en general na un manera den balansa cu nos medio ambiente. Lo aplica caminda por tecnologia moderno pa por obtene resultadonan mas efectivo. Lo amplia e cantidadnan di dam pa tin mas reserva di awa. Lo reduci belasting y invoerrecchten pa negoshinan dedica na agricultura y pesca.

**17. Pensionadonan:** Lo percura pa e pensioen wordo paga na tempo y lo crea incentivonan pa baha e peso di gasto pa nos pensionadonan, por ehempel dor di introduci un caarchi di transporte publico gratis y descuento riba servicionan publico. Lo explora unda e peso di belasting ta pisa desproporcionalmente riba pensionadonan y reducie.

**18. Hubentud:** Lo introduci un programa di atardi pa estudiante cu lo inclui deporte, arte, musica, etc., dependiendo riba e talento y deseonan di e estudiante. Un programa asina lo yuda den e formacion di nos hubentud. Lo percura pa transporte pa alivia e mayornan cu ta traha pa asina e estudiante por participa na e programa di atardi menciona. Tambe lo crea un programa di motivacion pa yuda nos hobennan enfrenta retonan.